

濂亭文集

濂亭遺詩卷一

武昌張裕釗廉卿

贈范鶴生吏部

鳴齋

京華去楚三千里下走別君十五年回首風塵堪隕涕  
驚看霜雪已盈顛生涯落拓餘孤棹知舊凋零半九泉  
萬事欲從何處說且憑爛醉看江天

書感

諸公稔禍甯堪說四十年來歲月遷盡解藏身三窟固  
豈知厝火一朝然萬事已逐江東逝孤憤欲回天左旋  
梗概書生今已矣扁舟夢去五湖天

贈方子白 翊元

嘉祐文章盛蘇曾并絕倫瓌才冠宋代奇寶出歐門顧  
我真樗散如君亦爨薪感懷知己者今古共酸辛余與  
子白  
俱受知於曾侍  
郎之門故云

夏夜府中作

火雲蒸暑宵不眠蘭膏熒熒相烹煎府中苦熱逃無所  
卻憶江湖思渺然我家舊住樊水涯開門十頃清漣漪  
招涼水次看箕斗瑤杓正對蒼龍垂天憐我貧假一笑  
玉盤夜落青玻璃須臾風定金鱗起菰蒲盡與風離披  
此時正可倒醺醺酒渴停杯呼茗旗夜來醉倒長松下

世間萬事浮雲馳祇今栖遲節度府曉來清夢墮江湄  
不及湖中老漁父三星在留南風吹

病起柬汪梅村

士鐸

藜莧養不足飢寒驅離家襤被來江城裏硯依官衙坐  
此室如斗涉彼津無涯道戰不能勝寒暑攻其瑕人生  
苦物役六賊矢相加心地收汗馬所要絕萌芽多患乃  
進道轉敗獲已賒醫師進毒藥故人遺甘瓜客中良深  
感作詩用拜嘉

贈劉生

兆蘭

積羽雖折軸彫頤空爾爲威鳳露一毛百鳥失光儀劉

生後來秀卓犖壓羣兒才鋒剗驅虎心胷蟠蛟螭歷歷  
一千年如身親見之淩紙光恠發山海隨奔馳走也才  
日盡讀書困管窺有如亡鏃矢欲射安所施得子張一  
軍亦足起吾衰吁嗟眼中人悠悠誰與期

秋夜

高秋霜氣入巖扃獨坐深宵酒半醒蕭颯寒風鳴敗葉  
淒清微月度中庭壯懷早讀范滂傳晚學今耽小戴經  
猶有憂時心未減步簷遙看上台星

無題

林風深夜涼江村明遠火潺湲水增波慘淡月初墮倚

戶出復入默默成孤坐宇宙尙豺虎念茲實勞我吁嗟  
帝有醉胡爲搆此禍吾生豈足惜尙免戈殳荷所悲蒸  
蒸民焉得謝轍軻秦帝威魯連趙削思廉頗憂端塞天  
地 缺五字

無題

高閣俯飛鳥開樽對暮霞五月大江滿飛雪落簷牙

無題

人生一瞬耳所爭乃千古道遠日苦促十恆不及五況  
復逐多歧而欲覲前武驚風歛以馳百悔不一補嗟余  
搆憂患尺捶已折半望古悅向若浩浩無涯岸亮知驚

漢書遺言卷一  
蹇姿騁途安及萬竭蹶競暮光猶愈長夜漫蹉局而不  
前汝乃是終焉

無題

萬幘更相代人生各有宜曠視攬九州浩穰誠無期下  
國萃瓊麗上都羅金龜紅埃上層霄化爲虹與蜺熙熙  
夸毗子相逐無已時得喪爾能主騁驚空汝爲名實忽  
爾忘乃今始知之迴轍求故步斜景已西馳雖復駕八  
龍一逝那可追遐哉漢董生戢影下書帷

疊原韻留別諸公

以下戊辰時客金陵

羣賢英峙儼崇巒部婁時從仰面看夜雨剪燈書有味

秋風判袂事無端  
雲山回首新知樂  
江海驚心行路難  
大業相期各努力  
未應身後識方干

贈方存之

宗誠

我家樊溪江上水  
東流直過皖山前  
青天相望一千里  
白首相逢渺七年  
文字虛名終底事  
山林幽寄自前緣  
翠微坐畔一尊酒  
坐看汀鷗下暮天

贈戴子高

望

往從樸爽論經學  
苦說長洲一老賢  
江表耆儒近凋喪  
浙西弟子歛聯翩  
風期孤往山皚雪  
文字千年江導源  
一笑相逢眞我輩  
秋風斜日白門前



題戴子厚先生岱頂看雲圖

先生高躅躡東岱往事披圖跡已荒  
今日普天望霖雨  
嶽雲無處海茫茫

邗江夜雨

晚泊邗江濱寒天黯顚顚  
鐙下盡數編放頭便已睡舟  
迨雜僮僕頂踵交相盤悲柝入幽耳  
輾轉始成寐醒聞雨聲繁淒滿篷背  
遠觸千載裏近感廿年事身世憂  
患端離愁與鄉思不知來何從  
颯沓一瞬至開目見短檠  
尙復耿殘穗惻愴遂及晨  
悄然起擁被

送何小宋方伯

景之任山西  
已巳時館鄂城書局

雲中太原天下脊左控

神京右朔方

帝遣重臣居肘腋天教全局輦金湯九邊羊馬來榆塞  
三輔芻糧倚晉陽從此蕃戎看警慄

朝廷西顧喜于襄

卿月南天照三載餘暉不與大江馳遺民最有攀留思  
賤子尤憐文字知苦憶石渠從積歲重陪玉墀定何時  
江干心祝重開府可許徐劉更獻詩

病起

癸酉時主講金陵鳳池書院

一病沈綿盡室憂今朝扶杖出齋頭陰森榆柳千株暗

爛漫芙蓉一夕休不用借取法界觀直須自譔逍遙游  
要知朝菌須臾景便是靈椿八百秋

幽居

以下甲戌

閒居絕塵鞅眷此一床書萬卷安可窮卷帙還自娛隱  
几望青天幽牕耿清虛牕前數竿竹涼陰覆庭除清風  
時一來披拂相虛徐對此足永日澹然意有餘卽事亦  
何有相看終不渝吾生固有涯百年若斯須寂寞期身  
後此意亦已迂聊從吾所好甯爭賢與愚

斜日

斜日在東牆秋天澹將夕卷書坐南牕餘暉耿櫺隙隱

凡無一事萬事懽以釋清風下檐端庭柯紛攬攬繁影  
二迴漾颯然感心魄脚蹒忽已暝松際露月霸

### 幼安

幼安蹈東海泉明歸柴桑一朝耽沈冥千載揚輝光高  
名燭天漢遺編寶琳琅范粲寢車中祕不露文章執節  
尤苦艱胡久鬱不彰馬遷賤守節班史亦豈良

疇纂書甯遺忘古來貞烈士但安心所藏湮晦固甘  
之守義亮無恇夷齊採薇蕨所悲在虞唐豈爲後世稱  
蹈死西山陽

### 種花

種花滿園中目翫取娛怡大鈞播雨露紅紫爭紛披桃李趁春剪菱荷當夏滋次第遞榮落薶蓼又及茲嚴霜已戒節弱植更幾時盛衰相代嬗豐悴如奕碁天運亮如此萬代相與馳自非松與柏歲寒誰能持

### 端居

端居無一事出戶信悠悠東去喜平曠稻畦閒芋疇園丁引清淮匪此澄塘幽一泓雖無多豁然清遠眸野人資灌溉朝夕得所求幽事抒情話真樸難爲伴爲我說種物荻芽及薺頭滕筍爭長子母瓜相鉤昨來一雨足茵茁如浮漚今朝乍放晴鳴鳩復鉤輶聞此愜所遇

頓釋心煩憂我生固坦蕩畏從簪紱儔多儀困纏縛貌  
語強呶嘍一曙解天弢茲晨信有瘳古來賢達人往往  
沈林邱跌蕩從野老儻遇東陵侯

城上晚眺遇雨卻歸

遠樹昏烟積高城寒角哀蒼茫江色暝蕭颯雨聲來蓬  
戶數家掩短筇孤客回入門燈影動惆悵倚庭槐

雜詩

蒼蒼林中檜凌霜挺高枝熈熈原上英旖旎能幾時獨  
以豔冶姿能令觀者移榮華在眼底怡悅實及茲苦說  
後凋節爲問聽者誰

遊北山

尋山不覺遠細路踏莓苔流水一曲轉桃花無數開澹  
烟何點宅深樹誌公臺遙想幽巖際高真儻可陪

夜泊

烟渚維舟夕深更月墜波遠林漁火亂暗櫓客船過

庭前桃花始開

桃花身舊種今日及芳晨雨樹青當戶一花紅近人春  
風幾開落爲客久風塵故里田園在羈栖笑此身

壽蒯子範觀簪

德模

遙持白下尊中酒好寄夔門峽裏天江水奔流一萬里

大椿坐閱八千年文章政事兩殊絕富貴神僊總晏然  
天下蒼生望霖雨祝君綠髮換華顛

卽景

卽景少塵事幽居日課添惜花除毒蘊芟竹納涼蟾雨  
過春治圃香添晝捲簾戒門謝車馬更欲數書籤

晝永

晝永院逾靜眠多思轉慵覺來日已午鶯啼花影重閒  
數庭前樹時聞空外鐘散人亦何事還復到金鍾

春日郊行

麥苗覆地水平田好是江南二月天新燕早鶯相爾汝



天桃弱柳鬪芳妍，鄉關萬里春如夢。  
江岸孤村雨似烟，自引壺尊成小酌。  
便將嬾慢送殘年。

舟中曉起

旅泊起常早，推篷怯朔風。  
霜清沙嶼曉，月落石梁空。  
殘雪明林表，寒暎出霧中。  
相依三兩艇，猶自臥漁翁。

曉發

江水與天盡，孤帆渡曉開。  
亂山舒子國，初日遠公臺。  
野寺鐘微斷，荒城門未開。  
前舟似故里，幾日楚中來。

卽事

日永閒憑几，宵深靜掩帷。  
研朱讐舊帙，試墨寫新詞。  
萬

軸紛如積千秋誰與期此生侵老病迴惜少年時

日暮

憑高俯萬井撥悶恣孤蹤遠見巖前寺因聽雲際鐘輕  
烟板橋水殘日孝陵松寂寞古今感寒雲深幾重

春日

春麥青青苗覆土要看韶華洗酸腐溪流乍轉明村隍  
秀絕岡巒帶平楚野卉無名爛自吐天桃一株顏何許  
江頭輕烟罨洲渚四山漠漠天欲雨桔槔鉤輦啼日午  
隔林何處祈蠶鼓茲遊佳絕清心府悠然宇宙容仰俯  
歸路茶烟散如縷想見午窗甌泛乳

張春陔侍御

盛藻

儀徵城中得異石甚佳爲賦此

篇

文身舊俗荒不經百怪巧競鑄幽冥萬品鑱空質其形  
媧皇所遺龍伯得戲鑿頑礦眩瓏璽甲角穿穴波痕紫  
霧雨蕩磨巖氣青一卷瓌璋表獨立千秋俶詭誰爲聽  
侍御來自古眞州一舸載歸此物尤自言搜取出敗礫  
不知當年誰氏留我爲摩挲三歎息豪家舊迹今荒棘  
菱谿大石出清漪廬陵苦爲劉金悲一時志得珍環列  
百年事往波東馳富兒奢惑吁可訕高人耆好本難刪  
東坡一死萬事足仇池片石百回看寶晉齋前玉珠白

零陵亭畔奔雲環妖奇瓌怪感精魄賢愚雅俗同心剗  
好奇有癖誰能免遇物不留安所患作詩一笑君勿嫌  
石不能言儻頭點

書卽景

南山北山殷其雷黑雲壓山如山頽白日出没走雲裏  
赤電迸射金光開飛雨驟來打高閣地如奔坼天如摧  
蒼茫便作兜羅海咫尺不見雨花臺須臾一掣度城東  
清風淨掃陰霾空波澄江遠野如沐千里一碧天磨銅  
萬事變滅亦如此榮枯不直一杯水且從高臥看屋梁  
夢回金鴨薰餘香

登高有感

興亡歷歷閱千年眼底青青六代山  
南北推移隨世重安危盤錯惜才難  
鍾幽寂寞栖何點江左崎嶇要謝安  
一片斜陽下平楚海雲無際暮江寒

元武湖寺中曾文正公畫像

貌公臨此水微禹眾其魚千載西湖上  
誰爲白與蘇隻手擎三界慈雲覆九區  
蓮華圍寶相可稱老文殊

讀松雪齋集

文章翰墨總翩翩典午風流紫府仙  
可惜江南好風日衣冠不是永和年

夜

聖賢去我已千載手把遺編闢且開惟有多情天上月  
蒼茫曾照古人來

吳摯甫以書來介其邑馬生通白

其利

令遊於裕

釗之門次韻酬之

乙亥

君才霄漢上璀璨五雲閣顧乃眇甕牖夷陵下于谷走  
寶褐夫賤安得裏中玉橫目萬萬千癖愛惟子獨枝道  
得奇寶遺我不顧俗一見爲眼明鼂采昭炳燭此才出  
名邦千尋不待續君獲橐罔私吾衰根已宿爲斲媿未  
能辱公求大木

金壇馮夢華

煦

副車相遇白雲輪舟中以詩見贈

次韻酬之

舉世竟如槐國夢有心同抱杞人憂蠹簡蟲編聊日永  
山林鐘鼎孰千秋君當奮厲稱文伯我已頽唐作醉侯  
獨把新詩開且闔暮雲無際送行舟

春日上謝公墩

以下丙子

紫金山上雨初晴燕雀湖邊水乍生江自遙天空外落  
春同大地眼中明東山絲竹空神想南紀綱維要手撐  
自歎寒灰生意盡不勞辛苦問蒼生

春感

身世同看百事違  
摧頽那得絆餘暉  
江河自古無西注  
鴻雁經時又北飛  
海上鯨鯢春偃蹇  
山中薇蕨晚菲微  
酣歌痛飲從疏放  
跼蹐孔顏誰是非

與友人夜話

早歲心期隘八垠  
乾坤瀕洞忽風塵  
誰知身作詩人了  
更耐君從盛日論  
白髮星星侵暮景  
滄溟渺渺足迷津  
一尊且共今宵醉  
明日踏鞵看冶春

與

牆缺炯微明  
新月靄初上  
迢遞眾星出  
寥廓高天敞  
向夕一事無  
對景孤抱朗  
鉤簾爐篆散  
隱几林箴響  
王維



晚好道頗復嬰世網陳慥學苦空師子落挂杖南榮顧  
其後□□□□陶潛真達人千載成孤往

深夜對月作

城頭寒柝響清越遠寺疏鐘微斷歇居人睡熟重門扃  
起步中庭望明月空階積雪地流汞河漢無聲清露重  
樹陰沉水半池黑竹光盪星滿林洞綠窗飢鼠走阼隍  
抱砌幽蛩吟嗚咽蛩吟復止萬籟空風定霄澄悅靜絕  
涼侵衣袂我欲眠獨孤明月懸中天

兜鍪

兜鍪孤我書千卷金爵從渠觚八稜今古真如一邱貉

風雲誰羨九霄鵬。朱絃疏越空三歎。肥馬輕裘自五陵。  
老鈍豈應關世事。寒窗枯箸凍癡蠅。

當時

當時衮衮看流輩。珠碧琳琅異采交。豈謂風霜更歲月。  
盡教荃蕙化蕭茅。今須諸葛紆籌策。古有林宗疾斗筲。  
長謝軒車吾已了。蒸黎可惜與輕拋。

秋日江甯城臨望

萬里浮雲度塞鴻。蓬壺海上又秋風。古今歷歷英豪去。  
日夜滔滔江水東。身世自生今日感。河山徒爲昔人雄。  
窮途阮籍空長歎。廣武山頭恨未窮。

野望

落木千山夕照邊  
高秋廣野正蕭然  
蒼鷹可是無拘束  
快意孤飛上九天

晚步溪上

鎮日攜筇西復東  
晚來初喜夕陽紅  
溪頭久立忘歸去  
決眚青天送塞鴻

樊港道中

澤國霜清農事稀  
菰蘆深處水禽飛  
幾家田舍溪頭住  
寒柳參參靜掩扉

獨酌

半甌苦茗一爐香  
日月壺中本不忙  
坐對青山傾白酒  
可憐千載幾滄桑

雨霽

小雨霏微暎落暉  
桑陰罨靄麥苗肥  
先生食飽倚門久  
閒看村童騎犢歸

夏午

高捧離騷百回讀  
籐床自在倚庭槐  
曹騰老子忽眠去  
書卷隨拋石上苔

臺城

齊梁宮闕空烟霧  
玉樹衣冠委棘荆  
太息二千年似夢

鐘山依舊繞臺城

舟行

篷窗睡起已黃昏  
閒看輕橈逐浪痕  
一曲柳陰舟乍轉  
稻田水碓數家村

秋晚

霜嚴初欲換冬衣  
野色淒清林影稀  
斜日渡頭輕艇泊  
家家水擔柴歸

長夏

日長兀坐渾無事  
開戶豁然雙眼明  
散髮脫巾出門去  
溪南石上看雲生

雨後

薄雨初收滿院秋  
移床樹下儘句留  
閒持一卷看雲起  
墜葉時時一打頭

讀史

華夷冠帶自迢遙  
蒼莽山川劃建標  
誰遣渾邪居塞內  
千秋恨殺霍嫖姚

飲酒

百歲光陰一轉晴  
酒碗當前且細傾  
苦爲千秋鐫肺腑  
窮儒癡絕可憐生

晚興

夕照微明薄暮天  
榜歌迢遞起漁船  
溪頭宿鷺忽驚起  
飛破平湖十里煙

新歲口占

以下戊寅

羣公玉珮趨青瑣  
九市華鐙綴絳繩  
休怪先生渾不出  
年來心緒冷如冰

遣悶

朝攜酒椀望青天  
暮曳筇枝看碧烟  
莫笑此翁閒適甚  
更無人語亦堪憐

武林道中

千秋佳絕武林地  
今日扁舟趁急湍  
萬壑千巖來眼底

推篷爲上柁樓看

無窮烟雨漲林巒如此江山得縱觀  
董巨無人蘇白死  
憑誰收拾入毫端

睡起口占

懶將雙眼看塵緣閉戶焚香放意眠  
夢裏神遊天地始  
覺來今日是何年

無題

車如流水馬如龍九市紅塵一萬重  
老子杜門酣午寢  
夢回鄰寺打疎鐘

夜與友人論文



文章垂世千秋事俗論紛紛那得知苦覓汗牛充棟地  
可逢見蝨似輪時青天白日無纖翳大澤深山足怪奇  
解卻此中三昧了不勞揚馬是吾師

漫與

衰顏兩鬢已如霜得失無勞問彼蒼往日風流期謝石  
暮齡耽玩在蒙莊百年所欠惟一死萬事了卻無寸長  
但擬今朝林影下一尊濁酒送斜陽

醉中作

多事大撓作甲子於今五千八十霜賢愚萬古皆塵土  
尺寸幾人爭短長峴山羊公苦墮淚窮途老阮日舉觴

身後浮名眼前酒付與先生閒稱量

讀史記

馬遷死去二千載一史孤留天地間萬古高文探月窟  
幾人真面識廬山茂陵松柏餘幽憤湘水荃蓀共淚斑  
曠代名山合專席遺塵可許步揚班

鐙下放歌

百年屈指三萬六飄風浩蕩吹樺燭儀璘日夜轉車輪  
沉復義和鞭撻速秉燭夜遊尙苦短更禁鐫鑿相催促  
振古靈均真祠始倡導詞章作嚆矢坐令千秋萬歲中  
肝腎雕盡癡憨子伏首攢眉巧語言燥吻乾喉誦文史

其朽不朽爾能必不朽時竟何益天公媚爾盜化機  
博得雪霜滿頭幘雖然此中有天定石暈木癭甘自病  
人嘲春蠶自纏縛蠶不作繭復不樂枝頭宮徵栗留聲  
壁間繆篆蝸牛角萬集賦子各冰炭造物慎到誰夢覺  
深夜簾櫳冷似秋一彎涼月屋東頭請君息慮觀無始  
短長卽值苦推求

晚霽

園林初夏綠陰成香篆銷殘茶鼎鳴殘雨乍收空砌響  
晚晴忽暖小窗明靜觀興廢千年了飽歷暄涼萬慮輕  
日暝書堂閒隱几鴉邊新月半規橫

戊寅立夏日

浦風幾日長新蒲又是江南櫻筍厨春事怱怱一彈指  
流光冉冉幾循鬚日斜深院移槐影雨過前邨拭芋區  
老子故應常日醉雜花生樹水平湖

卽事

嬾人厭追攀沙爾謝塵鞅端居頗無慘撥悶信拄杖屋  
北有小邱劣可覲曠朗日夕岸幅巾時時縱孤往初夏  
雨新霽高旻蕩塵埃鍾阜青在眼清淮眇盈望攀樹新  
月升戀巖宿雲益曖曖空潭陰迢迢遠林響脚躑忽已  
久暮禽趣林莽徒步復歸來燈影滿書幌

歸思

浩蕩江湖送落暉回頭五十六年非  
焦桐入爨絲絃絕  
弊席懸門車轍稀白眼瞻相萬事改  
青山迢遞幾時歸  
遙憐此日家園裏翠稻烟稠紫筍肥

雜詩

曜靈出扶桑濛汜乃一尺鷓鴣啼青春  
鷓鴣倏盈耳旦暮春秋間曾未能彈指  
百年與千禩亦復如是爾逐逐驚其華  
傷哉夸毗子傾身奔無涯回首日盡矣  
復欲自匡返誰更與貸是君子亶修身  
道存無終始

我聞語有之蘭以香自焚雖然蕭與艾  
獨能遺斧斤美

惡固同盡罕乃獨見珍蕭艾殘則已蘭死香未泯寶鼎  
揚芳烈千歲有餘芬曩令甘糞壤安得垂繽紛爲草當  
作蘭李白誠知言

秦政擅長距六合坐陵跨兵威讐夷貊功德小虞夏驪  
山起高冢阿房擢修架墳土未云乾真人已翔灞豈惟  
九廟隳千載足譏罵快意直朝昏蔽惡高嵩華南面猶  
若此况自鄒以下高驚誠足忻下流吁可怕

喃喃幕上燕飛飛繞庭除自昔巢君屋春秋不相渝朝  
出啄新泥暮歸哺其雛豈有霄漢心聊爲牖戶謀霜雪  
忽歲寒棖棟日剝壞惻愴摧中腸傾覆懼將逮欲去無

與適四野雨如晦堂上猶笙歌隱憂不可戢天命竟何  
如中夜守相泣

鄒衍談瀛海迂怪昔所哈安知千歲後有士西極來嗟  
乃實有之尙未究其涯大塊稊稗耳四溟坳堂杯縹緲  
天地外億萬金銀臺六龍所經過一一豁達開生世苦  
迫隘聞此吁怪哉願得乘飈輪高步躡天街龍角泊鵜  
尾瞬歷十二限排雲謁紫皇羣帝參追陪吞燕紫琳腴  
運持北斗魁揮手謝時人不復公等偕

庭前邀明月對此一尊酒無言自歎深有此莫逆友舉  
酒一相酬月自何年有我生幾寒暑忽已老成醜若爲

綿今昔清光無敝垢昔視何如今今更何如後照盡百  
興亡頗復惻心否月旣不我酬我亦酩酊久闔戶睡去  
來夢蝶飛幽黝

少小慕奇偉遠懷名山游膏車指長道命僕展鳴騶亦  
有三子相從驂騑驅天寒日苦短道路阻且修同來  
或頓仆中道摧其輶復有筋力疲踟躕憇林幽同顧歧  
路間熱尾馳萬牛奮勢獨前邁日夕敢遲留遂躋泰岱  
顛下俯陵九州乾端與坤倪一一我入眸揮袖挾雲漢  
騰身跨蛟虬淩風忽高舉渺然不可求

咏史



功名富貴盡危機  
烹狗藏弓劇可悲  
范蠡浮家子  
胥死可憐吳越兩鴟夷

步李佛笙見贈原韻

螺贏螟蛉視二豪  
對持杯酒破忉忉  
塵寰垢濁掉頭去  
江介風烟入望勞  
舉世相看弃周鼎  
一寒誰見贈綈袍  
狂歌痛飲眞長計  
莫問觚稜百尺高

五十年來夢惛惛  
乾愁摧絕平生心  
世事欲看歐冶劍  
深心獨識伯牙琴  
醉來試攬天邊月  
歸去應題漢上襟  
不用悲咤憤時俗  
一邱之貉古與今

晚步

向夕策短筇言尋東城路度橋見澄潭蒲葦亂無數天  
光盪空明一水飛白鷺紅日西銜山素月東升樹悠然  
遠山外暮氣成蒼霧蒼茫觸遠心孤馳不知處遙望誌  
公臺徑欲穿雲去

長歌送李佛笙

李侯生與俗殊軌一生喙硬兀自喜撐腸萬卷不療飢  
腹如武庫庭如水廿年奔走困風塵一朝頓躋坐譏毀  
南走海濱北走燕喪家之狗遯其尾功名雖後氣無前  
閉戶讀書高枕眠箕坐白眼看一世低頭獨向顛張顛  
生平百學一無得感君汗慙還歎息湘鄉一去海寓空

孤窮漂轉隨天風老萼蹈海窮西極

謂藜藿齋

吳叔憂患悲

填匈

謂吳至甫余與佛笙及萼齋至甫並以文字受知曾文正公

參辰箕斗分離析

君今又去誰與同送君遠道飲君酒悲偷乖合亦何有  
掃除萬事勿復究侘傺抑鬱令人瘦

夜

風吹庭樹颯蕭蕭深夜誰同伴寂寥一點青燈閒凭几  
靜聽殘雨滴芭蕉

登燕子磯

維舟觀音門言登燕子磯山河信壯哉星羅而天圍蒼  
茫幾千載興廢如奕棋得人爲金湯失人成涕糜韓彭

不可呼重險一朝夷傷哉廣武歎無貽劍閣嗤

偶書

少日苦求言語工九天九地極溟鴻豈知無限精奇境  
盡在蕭疎閨淡中

李申甫方伯見贈原韻

江東劍北夢思頻忽漫相逢楚水雲霜雪人俱侵暮景  
湖山天爲與閒身異時上將揮神筆滿座諸公照德鄰  
回首廿年成一夢秋原宿草幾陳人

讀史

摧秦首事獨重瞳未讓龍髯仗狗功遺廟千秋偏見毀

可憐成敗論英雄

讀吳柳堂吏部遺疏 以下已卯

鼎湖龍去影模糊松栢蕭蕭舊事徂豈謂孤忠餘下土  
獨持一死正皇儲百身莫贖秦鉞虎千載重瞻衛史魚  
袞袞諸公如束筍幾人血淚灑青蒲

偶題

淵明五言貧更澹放翁七絕老逾清閒來試取一編讀  
何異魚山聽梵聲

芭蕉

舊種芭蕉六七本欣看一握已青青老夫不爲工書計

聽取深宵雨滴聲

秋夜卽事

古人吾不見薄俗爾誰親  
秋雨初涼夕閒庭獨坐人  
蛩聲吟砌苦燈影動牆新  
插架陳編在憑渠老此身

秋望

晚霽江天豁新秋物色涼  
幽花棲宿雨高柳餞斜陽  
稻經時熟杯罌破鼻香  
時艱欣歲稔更惜日持觴

秋懷

涼颼警秋序大火西南徂  
六龍不我留蕭蕭鳴蟋蟀  
寒燈耿虛幌木葉下空除  
深宵卷書坐萬景淒以孤  
朝來

攬明鏡霜雪盈髭鬚感喟步中庭怛然增鬱紆橫目營  
一飽偉抱腹九區疇昔少年日抗意追唐虞瓠落竟無  
施流光駛奔駒歟斂天淵懷狎蕩從樵漁

月夜江行

遙岑涼月上深夜大江明銀界三霄迴金波萬疊生魚  
龍迴夢寐風露颯淒清縹緲非人世吾行訪碧城

夜登晴川閣

霜高野迴浩無聲河漢西流北斗橫傑閣挈雲天一握  
大江流月夜三更棕鞋桐帽無人共汀鷺沙鷗與我清  
塵世勞勞真醉夢若爲靜處老餘生

范月槎觀晉以歐公生日招同人讌集愚園卽席

賦此

廬陵峴去已千載我輩重來醉此筵好事風流誰嗣者  
高名前後一潸然當年慶曆開皇極特詔天章納眾賢  
今日朝廷需望散幾時嶽降佐周宣

雪夜課經圖爲方生寶夔題

生兒何須似仲謀愚且魯乃取公侯杜陵正誚陶彭澤  
有子賢愚勞百憂深宵老屋風颼颼急雪打牕砑簾鉤  
青燈熒熒室幽幽低頭縮項聲嚶嚶勸兒上下窮千秋  
躋攀子姬蹈軻邱客聞此語乃大咲何異榆枋搶鸞鳩



所貴俊傑識時務今日豈復古初牟堯舜稊稂竟何物  
枉持萬卷輸兜鍪穿裝啗癰賜銅穴販繒屠狗冠沐猴  
父母黃金兒亦得要厲八極橫九州不信但看溟海上  
長鯨橫掣萬斛舟古來孫康寒夜手一冊豈聞常侍三  
更走馬縛取淮西酋

題范月槎大雨覓句圖

詩人秀句出寒餓鏤鑄肝腎真無那破帽籠頭硯水冰  
寒雨打窗窗紙破苦吟正爾坐窮愁卓午炊煙冷土銼  
丈人門閥冠雲霄富貴祗壽華纓影招搖僂佯豈不善  
胡亦慕此喉吻焦窗前袖手隱几坐寒聲蕭蕭響芭蕉

固知鉅材無不可遠心曠度神理超已甘憔悴較下土  
更夢煙雨從漁樵但憂此物工爲祟累公囊空客無幾  
快焚筆硯羅管絃晴日開戶看青天

奉酬姚慕庭丈

清昌

見懷原韻二首

白門秋雨霽時望暮禽還忽枉天涯訊來從江上山想  
公在空谷高詠出塵寰歎息經年別相思兩鬢斑  
一國眞槐夢孤懷共杞憂驚心問朔徼舉目望神州長  
夜何時旦浮雲忽變秋山中芳杜若歲暮可淹留

贈朱生銘盤

韓國產精鐵乃自冥山陽川涸山爲裂一朝夜吐芒天

地鼓大爐熾炭天帝裝龍虎忽騰上雄出爲千將希寶甯復有欲持貢玉堂美人在何許路絕川無梁吁嗟且置之慎勿投道旁千鈞重一發卽鹿懼亡羊祥金戒躍冶良賈在深藏尊養會純熙助哉韜其光

昭代盛文藻桐城今所推崛起得湘鄉大塗闢千蒼嘉子出海隅溯源識津涯茲事貴孤詣走昔聞之師幡腹牢百恠巨手剡兩儀赤身突虎穴精耳調牛鞞窮極闡莫處鬼神不能窺洞出九幽底忽焉曠且夷志士誠烈心我願更進之六經赫如火聖哲心精垂行爲率土冒言爲百世治幸生周孔後小技甯自卑一勛踐其奧再

助大其施

名區佳山水蒸餾孕奇尤英英范與張駮駢駢驂駢驂與  
子總六轡駸駸馳椒邱愧匪九方歎逸足忽並投敢云  
夜識道庶共持其輶王良飛上天房精光忽遭龍媒一  
朝盡在垆紛轅駒遇罕意彌珍惜哉難久留合并不可  
常迴腸增煩憂况聞子疇昔佳士復顧周遠聞輒心許  
想像鉤發眸因子一寄聲新月海東頭何日渡江訪吾  
當具扁舟

朱生泰興人范生當世張生簪通州人並從余游者顧錫爵如舉人周家祿海門人皆以

文行知名未之見也

宋徽宗畫鷹

老槎勁翮森峻嶒縞素便作風棱棱神鋒俊爽何乃爾  
知是宣和御畫之雪鷹生綃一幅懸粉壁杉雞竹兔俱  
凌兢千年流傳此遺物我爲摩挲喟且憑憶昔瓊林開  
廣謙龍翔池上水如練承平終日灑宸翰珍羽奇毛來  
四面文禽天鹿鸞鸞鵠從臣環觀歎且羨一聲白鴈野  
鷹來通津門外騎如雷舉族北行須臾事三館圖籍如  
飛灰五國城中風雪饗平沙大漠蒼鷹高二十五載宮  
中樂紇千山頭凍殺雀

濂亭遺詩卷二

武昌張裕釗廉卿

曉泊 以下庚辰

孤棹寒山外  
荒村亂水濱  
橋梁通小市  
鮭菜集清晨  
泥雪鴻甯記  
滄波鷺自馴  
浮生信飄泊  
天地與陶甄

空堂

悄然羣籟寂  
獨坐空堂細  
草上幽砌新  
松隱短牆門  
無車馬客室  
有旃檀香欲  
說此中意陶  
公言已忘

題愚園主人詩冊

柳州愚詞歌  
愚溪愚園主  
人欲與齊莫  
漫陋今更榮  
古

人中誰謂無馭馱

璀璨新詩三十六真如百斛瀉明珠大巫小巫可相見  
我欲和之一字無

閨思

清晝簾垂地微風動組紉游蜂絳檐網歸燕落梁塵妾  
思夢中夢郎行春復春玉階舊行迹惟見綠苔新

雨過

江天新霽好林表暮光分斜日映殘雨清風卷亂雲竹  
涼新葉戰荷溼暗香聞頓覺炎歊失開緘拂簟紋

高閣

高閣臨虛曠蕭然百慮刪卷簾招白鷺欹枕看青山常  
得一尊滿拚從兩髩斑酒徒朝有約卓午且開關

新秋

涼颼一夕送秋生幾日江天雁影橫燈火漸依虛幌動  
簾櫳新放小軒清疎林隱見星河影深巷迢遙砧杵聲  
節序催人成老大一杯在手共誰傾

漫興

飄忽儀璘轉太清浮生擾擾百無成車輪無角那得住  
碁局中心最不平屈子問天劇悲憤魯陽揮日空精誠  
十有二萬年中事解者長沙賦鵬生



夜坐

飲酒思元亮幽居類子雲  
深宵移燭影獨坐對爐薰  
風起流螢亂庭空墜葉聞  
壯心消折盡甘與白鷗羣

弱水

弱水終難渡神山不可求  
熊羆多隱霧蛟鱷盡乘秋  
來日憂方大諸公善自謀  
獨令

閭闔上

肝食問共球

蚤起

漏盡不成寐開門秋氣清  
蟲飛窗欲曙燈炮室微明  
寒

柝依稀斷殘星三兩橫青天高澹澹散髮倚前楹

夜

凭几高齋暮卷簾涼月生魚牀波影黑蛛網露華明  
卅載埋長劒餘生親短檠明朝棹孤艇浩蕩五湖行

山澤

山澤淹園綺

朝廷用禹臯卽今猶鹵莽至竟孰賢豪風急流螢亂霜  
空雁羽高一尊聊自遣妙理屬醅膠

書院庭中枇杷一株同治辛未之歲余手種也今  
十載矣垂蔭滿庭而吾尙客此感時撫事爲賦

此篇

庭際枇杷樹當年手自栽十年今美蔭孤客未歸來生  
事甯堪恤時艱實可哀後來誰氏者知我念如灰

月落

月落星窺牖風迴露滴琴飢鼯驚走柱宿鳥靜依林老  
歲厭塵事幽居多苦心茫茫寰宇內何處白雲深

范月槎丈屬題栖霞寺殘碑拓本

碑文陳江總撰  
李霽書

栖霞留片石嶺海記迷津太息天嘉後惟餘布上人  
筆法傳羲獻齊梁尙繼蹤滄桑千載後細意辨南宗

秋日登城南樓

落木亂高下蕭條江海秋長風吹大野寒日下高邱天  
地幾銅狄煙波一白鷗乘槎猶犯斗望遠不勝愁

不寐

倦客依孤枕淒清夢不成高天一雁過深夜百蟲鳴遠  
柝斷還續殘燈翳復明獨憐窗際月相伴耿餘清

古詩

驅馬西入關迢遰望秦嶺峽軋咸陽城九衢何佺佺赫  
赫王侯居絳氣燭參井華裾競趨蹌金鉤互馳騁省闈  
集金張朝堂坐魏邴九服惛威聲隻手持國秉喜怒變  
指顧風波生俄頃計讎雠脫囊寵移兵在頸禍機一朝

發鹿駭更能挺高衢信羣趨危轍實孤警徒步復歸來  
東臯候鼃鼃

靜夜啟重閨步出中庭前園林悄以寂葉露一何鮮長  
空舒白雲明月當中天乾坤實寥廓伫望復回旋無端  
自生感欲語不可傳旁皇還入室傍架取一編作者已  
千載讀罷爲惘然

地裂江海溢精衛孤銜冤梧桐竹實盡威鳳逝邱樊蒼  
茫元精理一寒遞一暄寒蝶死相保豕蝨忽同燔千載  
聖賢人莽莽歸九原可作吾誰與邈哉申屠蟠

退之勇衛道自以時無比摛文追卿雲著書排二氏飢

寒忽相迫曩懷挫復幾文章小技耳何其太自喜

屈平甘獨醒陶潛性嗜酒一端取相絜未覺陶公後眼  
看一世醉皦皦當誰偶糞壤奪申椒黃鐘避瓦缶正須  
一日中銜漱卯達酉客來但飲之甯復問誰某不肯酸  
其醜識一未知九

衰柳搖清波黯黯弄餘暉生意能復幾歲暮自依依韶  
華不可駐朝榮夕已瘁四序遞新故萬古誰能違時俗  
競窮窶我心非所希神仙徒荒唐服食不療飢衡武耄  
猶勤伯玉晚知非庶幾保歲寒無爲後世譏

水涸天根見風氣日稜稜萬物清以肅吾心與之澄圓

疏經霜露鮮美味難勝新釀復已熟縹碧如黛凝銜杯  
望青山悠然白雲升慨焉思古人千載若爲朋

飲酒

武昌一老髻絲盈朽態衰容兀自驚病眼觀書疑霧隔  
枯腸得酒作雷鳴已無將相王侯念更問千秋萬歲名  
但把清尊送遲暮一鳩嘯罷玉山傾

雨

秋中猶苦熱一雨澹驕陽氣已侵衣潤聲先著耳涼呼  
僮啟蓬戶滿意向藤牀向夕逾繁響泠泠未遽央

秋夜懷人

新秋燈火動悠然坐高齋夜深草露溼明月滿空階幽  
蟲伴我吟趣似與我諧遠羈誠獨適寡偶良復乖清夜  
美無央惜哉莫與偕宿昔同心者范范天一涯相望不  
可見兩地俱幽懷安得生羽翼飛度江與淮

暝

日落棲鳥喧清風動池淥閒雲度高檐遠岫挂喬木散  
人暮無營緩步自成獨霜落紫蟹肥禾登新釀熟一卮  
且可倒數酌忽已足頽然倚虛幌遠鐘時斷續

子房

垓下歸來萬戶封子房奇偉孰追蹤少游圯上逢黃石



晚弃人間慕赤松堪歎韓彭空走狗可能潛見測神龍  
功成不退徒遺恨徒跣猶憐相國恭

海外

海外真看更九州高天下地忽同流傳聞弱水西王母  
紛起人間博望侯大鳥翩翩橫海下天吳睽睨曉人愁  
司農歲發金錢盡博得蒲萄一醉休

愁思

一夕涼颺動園亭忽已非林鳥催客起梁燕別人歸慘  
澹悲笳發蕭條落葉飛衰頽心已折節序況餘悽

日日

日日庭前數暮鴉  
年年江上聽秋笳  
山風落後時過寺  
籬菊開時最憶家  
果熟歡聲喧鳥雀  
香殘煙篆裊龍蛇  
曲肱一覺藤牀上  
夢去樊溪揮釣車

雨夜

深夜一雨過  
薄冷侵戶牖  
挑燈起攬衣  
庭院深如黝  
冷風動竹籬  
離離雲見斗  
沈沈寺隱鐘  
迢迢巷吠狗  
靜景入骨清  
翛然把尊酒  
童子更起予  
開門翦園韭  
謂童且眠去  
我自斟酌久  
悠悠復已顛  
倒牀鼻雷吼

雪後吳山晚眺

不耐羈愁與苦寒  
踏鞋來上翠微巔  
千峰落照明殘雪

一道澄江侵暮天  
杳靄鄉關何處所  
飄零江海幾經年  
酒徒苓落今誰在  
回首平生一愴然

崑崙 以下辛巳

崑崙高萬一千里  
旁開四百四十門  
百恠蹲踖候指使  
羣仙出入看乾坤  
西北辟啟通局鑰  
日月光明相吐吞  
何物東方小豎子  
偷從織錦問天孫

感興

憶昔平原入洛時  
鉅人一見歎權奇  
縱橫逸足金纏轡  
苓落殘年雪滿髭  
江上閉門三日雨  
淮南落木一秋悲  
伯牙寂寞鍾期死  
綠綺塵封壁網絲

秋雨

庭院蕭條薄靄浮  
爐香一縷散清幽  
梧桐淅瀝響寒雨  
隱几無言天地秋

深夜

月光初半樹漏滴已三更  
靜室幽香影空階  
落葉聲衰年孤寄在深夜  
一燈明寂寂子雲宅茫茫後世名

江樓

嬾慢何心蹋九州閒  
扶筇杖上江樓  
京華北望在何許  
碣石東迴感未休  
葦蒼茫江氣白  
秋梧蕭颯雨聲秋  
謝安祖述俱塵土  
一醉從銷萬古愁

## 九枝

九枝縹緲隔非煙  
霧閣雲窗事惘然  
大地縱橫三萬里  
高名前後五千年  
中原得鹿無蠅紫  
歧路亡羊自涕漣  
湘鄉薨亡興化

謂劉庸齋先生

逝獨持卮酒看青天

## 紀事

維歲在重光夏秋彗四見  
蒼茫太紫愁陵歷金火戰訛  
言民萬口推占論百變  
惻愴是何祥耿如災阻讌蒼蒼  
天處高何與下視譴自古有司  
天造此孰實先重黎初  
傳述甘石遞推衍京翼逮袁李  
米鹽益增羨光色辨青  
赤抱鐫察背面聚井兆漢興掩  
房告周禪荒唐占星經

紛糾五行傳坐令千載下憂疑塞宇縣至竟果信否真  
宰誰與眄念此不能寐伏枕淚如霰

讀史

一治一亂雲翻覆天乎人乎風馬牛屈子歔歔哀下土  
賈生痛哭感中流卽看萬代千齡盡皇念三邊七國憂  
傾罷濁醪酣午枕今來古往一時休

簡吳至甫

劇飲狂談碎百憂往歡一夕逐東流雙魚遠道慇懃寄  
匹馬空陂汗漫游牛驥卽今同阜樾文章更用到韓歐  
至甫書來每有論文語高秋極目腸堪斷直北孤雲是冀州

高冠長佩欲何之率土鋪糟戶啜醕甯忍濡需宮豕鬣  
卻堪謠詠妒蛾眉茫茫人海勞天問渺渺予懷獨子悲  
日飲無何良計得沈憂空博髻如絲

道意

此老身如一葉閑蕭然蓬戶對青山書聲夜雨青燈裏  
帽影秋原落照間更肯尋方烏白髮有示余烏鬚方者輒謝之有時  
得酒赭蒼顏惜哉生後淵明叟不及披衣共往還

荃蘭蕭艾事堪哀溫燮真難兩眼開卷婁已於羊弃意  
嬋媛可令鳩爲媒崑崙碣石從飛渡燦爛寒門獨往來  
廣野滂洋江不盡高憑碧漢看紅埃

對酒

我生七齡把書軸五十三年風轉燭少年意氣今白頭  
縮項拳身一蝸殼中遭喪亂風塵昏十載流離竄山谷  
衰拙更作杞人憂端居日效唐衢哭五侯七貴馳高軒  
君卿子雲入華屋紛紛於我亦何有獨倚孤雲眇天末  
千齡百代一山邱新人舊人莽相續飢飽苦樂度一世  
苦爲太倉贏粒粟我年六十看若爾天縱假年幾轉轂  
脫巾且進杯中渌

唐貞女

尼山刪風詩首錄柏舟篇中壘繼祖述歲莪列賢媛垂



之在竹素淑郁紛蘭荃餓死無失節精言出伊川聖哲  
垂明訓名節行所先夫婦人倫始萬化肇其原人禽與  
夷夏繫於此判焉青天萬萬古大義日月懸猖披騁嚙  
語荒哉今世賢聽熒異域說土苴琳琅編聖制及民彝  
危乃一綫延衣冠速方謬閨闕秉義堅賴此足相媿庶  
使薄俗渝卓矣唐貞女無忝古所傳

泉水篇爲方貞女作貞女桐城方氏幼許同邑張  
傳榮未嫁而傳榮死貞女聞投繯不死卒歸張  
氏守貞今二十餘年矣

果行維蒙泉險難出山曲不假滌濯功天然絕汗黷霜

澄靜不波石出粲可燭有孚日當心不懼澤滅木永爲  
在山清肯爲出山濁無絕此終古春蘭與秋菊

晚步

散步城東路深秋景物殊園柑蟠宿蠹場粟下飢鳥新  
霽衣裙爽斜陽杖影孤數峰江外碧欲返爲踟躕

秋晚

披衣鐘響動殘月在高樓暗牖蟪蛄曙空堂絡緯秋凍  
瓶棲井甃風幔上簾鉤獨對青銅鏡覩然梳白頭

九日李佛生以詩招同楊蓉初編修

晨

登清涼山

次韻奉酬

佳辰勝地一登臺太息江山幾代才舉世何人肯聯轡  
獨君招我共持杯重陽自古皆如此千載相望誰後來  
痛飲且拚今日醉日曛倦僕莫相催

是日歸來復得長句再呈佛生

鄙夫疲羸科上槁時俗弃置那復道李侯亦是可憐人  
西風寒蝶苦相保九日招我清涼峰更攜玉樹從婦翁  
蓉初佛生之清涼山高出城中江山千里來雙瞳自是六  
之女夫

代興亡地流連盡日思何窮蒼茫暮色沈洲渚澄江一  
碧磨青銅鄉關西上在何許落日孤煙空冥濛海天一  
角東南望高秋九月風濤壯鯨鯉跋浪鬪鼉驕碣石三

韓氣懷愴黃茅白葦滿平原憑高極目愁心顏鳳鸞排  
盪無消息崑崙欲傾九河翻念此對酒不能飲欲題餽  
字口如噤歸來兀坐到天明爛漫黃花空似錦

曉發燕子磯

客行貪早發晨起豁虛幌大江屬清曉水天浩晃朗東  
眺連滄溟西瞻極漢廣海色金氣孤旭景紅波盪奇峰  
遞回復亂帆交上下雲端矯去翮煙中警孤響還見江  
頭人當門曬魚網願與波上鷗浩蕩成獨往

晚泊

落日澹青山清風吹微波晡夕泊煙渚客思渺如何人

生苦紛擾萬景自委蛇滄浪有漁父鼓枻方高歌

旅夜

維舟思已悽望鄉情逾緬旅人愁未眠靜夜江聲轉

舟出邵伯湖

舟行邗江上兩岸但平陸開帆出咽隘敞窗眺曠邈清  
霜卷老葑落日澹澄淥波淨行若空林遠望如幄衝煙  
白鷺雙插天蒼峰獨我生固瀟灑苦爲生事促對此豁  
煩襟一瞬亦自足

秦郵道中

十里長隄衰柳垂人家黯澹隱疎籬寒潮淼淼孤帆遠

正是邗江暮雨時

舟中月夜

停舫倚前汀江月初三五客子夜未眠清光入蓬戶  
敗戶浩已淒凝霜蕩天宇一白渺千里珠貝盡騰吐白雲  
停孤光遠峰皆可數時有水禽飛微聞幽浪鼓清景得  
邂逅人世杳塵土明發更風帆茫茫何處所

贈邱履平

心坦

海上崛奇一男子當年壯志碎轅輜孤軍疾戰雲橫陳  
徒步歸來草屨門坐對江山生髀肉獨將詩句訊乾坤  
大昭挂壁無人問太白高高海水翻

漂母祠

一飯淮陰市千秋漂母祠風塵餘邂逅容易識英奇屠  
釣原多異艱屯殊未涯吁嗟市兒眼尙不辨袁絲

送黎莼齋使日本

絕域滄海東積水青天外徑絕風雲通波起宇宙隘御  
空馳颺輪拂日建雲旆使節上重霄書生眞一快乍揖  
王母歸復指扶桑邁

朝廷重珪璋蕃夷瞻袷襜六合今一家單車窮兩戒所  
以重皇華貴在解羣會策鼇謹銜轡然犀燭奸怪要能  
衄機牙坐令解椎紒睽睽最蛟螭篋貢鸛飴躋踏金

銀臺繚繞黃河帶待袖東海歸一洗雲夢芥

贈李芋仙

士蔡

昔我與君游京師拍張跳盪好男兒湘鄉老眼賞神駿  
一見識是渥洼姿於時海寓方全盛禹臯揖讓夔龍詠  
長安市上走輕車縱酒夜闌看斗柄競雕詞賦揖鄒枚  
旁搜蒼雅諏許鄭瞪目大笑羣兒愚致身當輔

天子聖一朝大盜起五管風塵暗天箭滿眼三十年間  
事翻覆鴻鵠鵠渺分斷皖江覲面苦怱怱蒼茫廿載  
各西東南箕北斗長相望滄江日暮號悲風春申浦上  
一握手悽絕相看俱白首豪氣尙復湖海人頽顏已作



支離叟山隤木壞痛宗臣宿草新墳感知舊癡頑落拓  
老不死衰窮猶共困奔走窮塗白眼事堪憐維揚誰管  
杜樊川徑須歸去荒江上峽聲喧枕酣晝眠

楚襄王 以下壬午

大王風竟不能雄噉獲真看一旦中不見蜻蛉與黃雀  
坐看鴟雁復鷺鷥蕭茅糞壤充幃用纂組琦璜結飾工  
愁絕他年江水上皋蘭被徑落青楓

步李佛生晚涼出游原韻

佛笙先生自笑狂脫巾散髮去追涼卽事筇竹一枝好  
何處芰荷十里香信有野鷗狎滄海可憐雌雉在山梁

斜陽澹澹清江遠放浪人間更底忙

佛笙甚貧而苦吟不已更疊前韻調之

短李窮愁老更狂喜從熱惱得清涼苦無蜀漢千頭橘  
夢想南豐一瓣香被髮終年吟澤畔蹇裳何處望津梁  
新詩不博逐貧用爲問先生何許忙

悲秋

至今阮籍爲身謀滿眼山川忽變秋衰朽誰裁豪士賦  
夢魂長抱杞人憂敢云藿食憂天下可禁橫流徧九州  
流水桃花杳何處欲從漁父棹扁舟

靜夜

平生與俗馬牛風老更誰人念此翁獨有幽蛩最親切  
一宵伴我月明中

淮上卽事

蕭蕭景物澹殘秋杳杳征帆掛客愁山畔微雲明佛寺  
柳陰斜日泊漁舟浮生浪迹何由住終古清淮自在流  
但使殘年猶健在長憑一艇釣滄洲

送別

客舟解纜忽飄然獨立江頭欲暮天渺渺孤帆半明滅  
倚筇望斷夕陽邊

溪上

清磬一聲搖遠天  
漁舟歸去水生煙  
飛飛白鷺向前浦  
獨立斜陽暮靄邊

偶步

一抹青山薄靄橫  
疏林斷處夕陽明  
村中日暮閒無事  
步向東溪看月生

江暝

斜陽衰柳外歸鳥  
暮雲端舟子掛帆  
去空江生暮寒  
無題

奔峭挂殘雨平湖  
澄晚明煙際扁舟  
杳鴉軋聞鱗聲  
微雲耿殘夜落葉  
在江樓渺莽空江  
裏風波生旅愁

秋花寒抱砌暮雨氣侵簾  
卮酒深深引爐香細細添  
煙水靜無人浪紋自相逐  
斜日入荻叢鵲鵲相對宿

無題

引商刻羽誰爲聽出戶看春信  
所經伯樂無人牙曠死  
獨餘柳眼向人青

桑柘陰陰柳絮稀平田渺渺  
鶉鵲飛前村一抹炊煙起  
處處村童騎犢歸

寒月飄天雪滿松短檠深夜伴  
龍鍾栗魁煨熟如灰燼  
眠去曲肱聽寺鐘

農家夏日最奔忙偶趁清風追晚涼  
夜月柳陰人未寢

邨翁荒渺說隋唐

邨落人家溪水西  
平疇十頃綠秧齊  
老農向晚荷耰去  
暮雨蕭蕭布穀啼

無題

藉草坐溪上  
心與流水遠  
冉冉藻荇漾  
粼粼白石見  
游鯈清可數  
日光爛莫遯  
落花逐輕湍  
婉孌相回轉

舟中雜咏

以下癸未至戊子時主講保定蓮池書院

叢蓼經秋江慘澹  
自交午不知芸生民與汝誰辛苦  
容與漾輕舟菱葉何汎汎  
自可任波流不堪持作鑑  
敗葦倒清波枯荷堆寒浦  
秋風一以動漂泊誰爲主

迅羽薄層霄潛鱗依寒步浮沈各天機終古不相喻  
葦蕩中哈呀鳬鷺爭汎濫甯識江海寬隨波自澹淡

安州道中

孤艇蒼茫去平湖自在流人家煙樹際縣郭水邊樓寒  
葦澹將夕疏林颯已秋飛飛雙白鷺故向遠村投

菰蒲深處住人家楊柳陰陰四面遮白板扉前孤艇繫  
一灣流水浴雛雅

斷霞明處白鷗飛浦溆縱橫迷所之葭葦蒼茫煙水闊  
望中何處一帆遲

當時走馬長安道歷歷蓮橋記舊游今日扁舟橋下過

回頭三十二年秋

蘆汀葦蕩碧無際  
雲影天光靜與涵  
今日風帆何處所  
煙波滿目似江南

舟赴天津計日與至甫相見

淀水東流去  
羈愁相與長  
夙心懷舊侶  
暮氣動新涼  
一鳥飛寒水  
數家明夕陽  
晚來無限思  
葭莢白蒼蒼

讀陳璉哀洸口詩

霸氣東南事已休  
況緣貝錦弃良謀  
信陵憂死大梁陷  
李牧讒誅全趙收  
吳下新謠黃菜蕪  
陵遺恨白浮鳩  
敗亡覆轍一邱貉  
江水千秋東北流



歌風臺

漢皇東破布軍還  
游子悲鄉淚自潛  
芒碭風雲懷猛士  
枌榆父老識龍顏  
千年魂魄猶思沛  
一代規模想入關  
終古長陵原上水  
故應流繞竟徐閒

春感

何處春風叫紫鴉  
深宵愁劇不成眠  
鄉心與月同千里  
客舍看花又一年  
箕斗簸揚天漢上  
祲氛離合海雲邊  
便須撥弃人間世  
逕向蓬萊訪僊僊

春日登樓

樓高出萬井  
春至一登臨  
草樹觀生意  
關河動苦心  
倚

欄天地闊漂梗歲年深浩蕩懷今古餘生獨撫襟

無題

太行西來俯全燕千峰萬峰青鑱天左出居庸走東海  
橫捩有若龍蛇蜒

孤憤

議和議戰國如狂目論紛紛實可傷萬事總爲浮僞敗  
一言無過得人強盡焚芻狗收真效甯要束蠡列眾芳  
獨把罪言欹枕讀一聲白鴈淚千行

百年

百年伊洛此其戎辛有誰今擅達聰萬事悠悠無可說

卷之二  
一心耿耿有誰同乾坤不柰天胡醉今古甯聞日再中  
千載乘除盡如此湘纍枉用悲回風

尋梅

老夫衰嬾終朝臥端爲梅花發興賒江上正思雙屐去  
籬邊忽放一枝斜薄雲微月澹無影野店斷橋寒未涯  
帽影翩翩何所住一尊判醉野人家

前溪月上見清影野寺鐘殘聞暗香如此風標眞曠絕  
爲渠惆悵端相望百昌在地猶潛伏孤植先天獨自芳  
始信霜中傑出者不偕羣卉共行藏

遣興

姦雄惡少皆封侯鄉里小兒鼯鼠裘志士掉頭潁水去  
可憐濁酒澆清流

佳人

西方有佳人朝霞耀穠李樓閣上紫霄琅玕被玉體俯  
仰若神仙貴盛誰能擬霜露歲忽晚二豎巧相抵輾轉  
衾幃間晻晻日西靡覩此爲心悽悲哀不能已我有紫  
金丹可以起人死願言持相贈重門深萬里惻愴無由  
施淚下如流水緘之篋笥中湮闕至沒齒

龍宮篇

傳聞大海底乃是古龍宮萬寶裝樓臺突兀上層空蹉

跼歲月淹頗受濤浪衝箕踵稍齧蝕楹桷剝髮形龍伯  
喟然興疇哉若予工巨魚首騰出金木臣能攻噴沫呼  
其朋鯁鱗鱧鯢鯛大者鰈與魴小者乃活東鰭鰈揚其  
斧當魴負其杠螭蜺及詹諸蹢躅而相從曾不知海大  
乃云與天通長鯨睨其旁箕眼射波紅修尾儻一掉咄  
哉怖殺儂

擬古五首

饗帝奏鈞天荒哉鶉首賜助華姒子姬一朝俱掃地甯  
知二千載蒼天復此醉酒星耀光芒北斗揚其觶傾瀝  
灑八紘四海皆鼎沸巨鼉擺足搖共工觸柱碎駢馬跋

浪出百怪騰自恣大瀛一簸蕩兩儀危欲躓卽之耳目  
震念之心膽悸來者方萬年茫茫將何至

蛄蜨工轉圓糞壤則叢之天地所賦子逐臭情不移青  
蠅實同德臭味無差池駢頭並競入啖咋甘如飴燒雍  
倏一炬焦沒無復遺鳴蟬在高樹悵悵彈朱絲

開第康莊衢稷下乃談藪雕龍炙轂輟一閱相聚處行  
也工談天羣吠推爲主遠窮九瀛海上極萬萬古一一  
指諸掌僂指皆可數高論振暗聾牛龍亦首俯曾未能  
知十荒哉說二五謬誤實多涂咄咤誰敢侮雷同相附  
和萬竅并一鼓翩翩桃李花寂寂無一語

昔聞廣成子乃在崑崙邱呼吸天地精百體堅且柔晏  
然合溟滓萬歲猶一周願往求其術相去已千秋寥哉  
不可接海風吹九州大明忽西傾怪鴟鳴啾啾如何仰  
俯間乾坤邈已幽長嘯激悲風逝欲乘桴浮

西方盡白馬東方青驪馬北方烏驪馬南方盡騂馬馬  
一百萬匹騰驤紛在野我馬旣已閑我車又已堅黃金  
爲馬勒珊瑚爲馬鞭車輪轉百寶眩若流波旋王良策  
其後大丙御其前放意卽長路四顧忽茫然東出有東  
海羣水浩飛翻西去阻大河盤渦千雷淵太行塞我門  
岵嶢而嶺阮投鞭坐歎息淚下如流泉

豔歌

芸芸蕙蘭花盈盈中閨女絕豔兩值遇靜對默無語微  
風散幽馨菲菲自襲予悅焉不自知心醉入肺腑形神  
兩俱釋夢寐魂相與可待雙玉佩相要彼洛浦太息誰  
與言脈脈此終古

客去

大德固包荒賢愚何算焉顓顓獨不化難與俗爲緣獨  
處恆自芳有邊乃不蠲威如蘇糞壤昇以置我前日稷  
來客去開軒望青天長空一何寥白雲澹若仙前山氣  
佳哉流水復悠然



連日晴霽中秋忽雨苦悶戲爲長句

嫦娥狡獪故相惱不放今朝一寸杲連宵激灑委金波  
滿意明朝好懷抱晨起褰帷忽惆悵決泝游氛塞晴昊  
空堂冉冉漸黃昏淅淅繁聲響梧槁旦暮佳惡工舛錯  
何況萬事苦顛倒漢文心歎馮唐少武謂少優臣已老  
鵠鴟剌天鳳凰囚蹇驢艘路蹶伏阜鼎彝銷冶作釜鬲  
杞柳戕賊成栲栳伏波冤憤南海珠卞和痛哭荆人寶  
人生能得幾中秋況復千秋不常好盈缺三與五相推  
成虧百甯一可保念此佳際增悲傷謂天蓋高無所禱  
浮生誠復困乖互造物無乃實忌媚萬古浮雲蔽天地

喚取清風快一掃

傷春

南飛燕燕北飛鴈青青又徧江南岸江南二月好春光  
可惜流年暗中換春光歲歲復年年愁人夜夜達旦旦  
空外北斗轉迴環蟋蟀鳴罷鷓鴣喚昨日鷓鴣黃今鷓鴣  
秋天吹墮扶桑枝漆室孤嫠起長歎湛湛江水青楓寒  
眼看海枯石亦爛

威鳳篇

威鳳下丹霄飄飄來紫庭光色燭宇宙再撫周八溟音  
響一何遠離離諧咸諤白日忽再中天地穆且清一朝

增翮去曠世不再鳴仰視羲和車冉冉復西傾恍惚聞  
空外乃復有鷦鷯雖乏搏風翼頗能繼其聲后夔去已  
久顧視莫誰聽徘徊無所止高厲浮雲征西游聞與崑  
東翔蓬與瀛

放行歌

今日忽不樂杖策登南山灌木翳廣谷荆榛蔽平原羲  
軒堯禹盡塵土伯翳庭堅不可攀矯首東西南北望但  
見昔時邱與墳前有萬萬古後有千億年我生胡獨於  
此間蒼天蒼天高高上無極使我心悲抑塞侘傺不能  
言

無題

盲風動天地日月浸已馳羣芳盡凋落繁華復幾時  
馨香空抱獨出門安所之鶉鷃盈山樊孤鳳能爾爲是以  
商山翁一往不復疑

步王晉卿見贈原韻

我屬聞君語當仁不讓師嗜痴偏有癖送衰更多奇  
鵬鷃誠縣矣雲龍忽媾之衰羸慙角逐幾欲去其旗

偶書

向日交游斷鴈分匡居終日對爐薰曳藤閒倚庭前樹  
岸幘時看天際雲苦愛林泉虛報

國恨難簪盃日論文晚來更向池邊立靜受清風漾穀紋

春日雜興

東風吹庭樹數日萋已綠離離階下草亦復豐且縟郊外更紛繁青紅爭簇簇山容換春姿池波動新淥天地本無心時哉妙轉轉人道亦如斯元風嗟已邈仁皇穆垂衣生民何其福

夜坐

耿耿明河轉屋隅娟娟涼露溼階除風聲滿院鴉翻樹燈影小樓人讀書終夜有聲聞絡緯衰年無寐似鰕魚

似聞雨足秋成稔明踏城東看菽蔬

夜霽

晚雨過高城青天萬里晴端居恆不樂騁望若爲情海  
氣纏秋殺鄉心懸月明清砧與畫角一并作秋聲

讀鬼谷子

赤文綠字萬萬古天遣祖龍付一炬聖籍燔弃誠可傷  
百家屏絕良亦愈雕龍談天炙轂輟豈不與世爲大蠹  
炎精蕩滌地天開稍求遺書褒鄒魯詩書掇拾出秦餘  
千百尙未能十五燭火螢燄翻有靈爭茁有似禾生穰  
鬼谷晚出尤怪謬七術縱橫安可語儀秦挾持游諸侯

赤舌燒城焦九土原野脂膏川流血傷哉此毒何太苦  
自從西京更<sub>漢</sub>代朱紫元黃益難數聖伏神祖兩儀幽  
虎逝龍亡百怪舞學術紛政道亡羊姦邪依附翼傳虎  
安得咸陽然死灰更與一燭圖書府留取六經作菽粟  
盡焚茶蓼雞榛莽宇宙清穆返結繩大庭赫胥快一覩

崇秩

崇秩冠三輔強宗壓五陵風雷生警欬燕雀盡竊騰流  
水門前騎明珠海外琛一朝身死後弔客有青蠅

逝影

輪轉梭飛不可留滔滔江海日東流世誰與我復青眼

少不如人況白頭鳳鳥河圖千歲邈荒臺老樹一時秋  
座中佳客尊中酒了卻殘年萬事休

罪言

竟觸鯨牙捋虎鬚咄哉此舉謂良圖積薪不解先移突  
發弩能禁後脫弧豈有療飢餐毒藥可憐從瞽問迷途  
噬臍它日甯堪說十萬橫磨一擲輸

不眠

耿耿寒燈人未眠中宵百感忽茫然芸生大抵禪中蟲  
塵世甯聞地上仙滿眼風霜侵暮景回頭哀樂愴中年  
白衣蒼狗終何許怪底三閭欲問天



夜飲

霜雪盈顛已嬾搔一瓢政可手親操清風乍起楸槐響  
缺月已低星斗高世上幾人悲曉髻尊前萬事渺秋毫  
君看徐傅同時盡爭似柴桑醉濁醪

天末

天末人何處堂西月漸低老人愁不寐夜夜野烏啼楚  
北斷消息海東無鼓鼙離憂一萬斛應與太行齊

緩步

兀坐終朝靜掩扉偶從食飽步餘暉寒波微漾魚爭出  
夕日初沈鴉亂飛閒日偏宜籠醉帽秋來漸欲授寒衣

白頭久厭人間世何處一庵眠翠微

雨後

門館蕭條楊子居微涼新喜晚晴初霜天橘柚寒初熟  
夕照園林畫不如生計但須三畝秫窮年安用五車書  
園丁舊買金鴉觜已辦荒畦雨後鋤

感秋

浮雲起西極奄忽東北馳商飈振大野頽陽傾逝波重  
陰黯天地時節忽蹉跎依依堂前柳青青石上蘿婉孌  
復幾時坐見叢枯柯飛飛黃蛺蝶尙爾相婆娑天運不  
可違爾能如命何

古意

南國佳人悲曉霜  
水精眠夢殘  
沈香通犀宛轉復宛轉  
金塘飛去雙鴛鴦  
排雲拂霧上高閣  
五城十二樓相望  
琚珮瑤璫凝且翔  
迴身顧影步生光  
東家有女年十六  
獨坐空房感蛾睩  
金鞭寶馬誰家郎  
往來蹀躞空游目  
君知憐妾顏如花  
君不念妾身如玉  
藍田寂寞玉煙荒  
盤龍牢鎖銀屏曲

血書圖歌爲宜興崔節婦作

節婦今京兆  
周君某之女弟爲同邑  
崔某妻崔應禮部試居周京兆所  
節婦從焉頃之崔病死

節婦誓以身殉其母與兄以姑在義不得死沮  
之節婦乃刺血作書寄姑具言狀越數年節婦  
亦病死京兆令畫者作血書圖紀其事

青楓慘慘蜀鵲喚銀餅素纈中分判妾誰爲生夫已亡  
妾欲死夫姑可憫可憐剝蘗復治絲妾心更比絲紛亂  
刺血寫書增與姑血縷著心分注腕二千二百二十字  
一字一縷血痕漫素娥魄死青天泣湘竹夜裂蒼梧斷  
海水可枯石可爛此血千年不可磨碧影迢迢在河漢

### 塞北花

塞北之花江南雪兩者一例易銷歇今雪在北花在南

終能幾日相戀貪本來抱質不牢固生縱得地時難淹  
繁華爛熳徒爲爾大造終古自溫嚴君不見高岡松君  
不見古井水無冬無夏長如此物之生貴自立耳

### 秋風歎

庭前秋風響颼颼大地一夕移壑舟清揚婉孌者誰子  
昨日綠鬢今白頭白日西馳江東逝居其間者誰久留  
君不見西指咸秦東伊洛大梁建業皆王都百代過眼  
如飛鳥驚波一瞥千浮漚山川城郭閱帝后甯異過客  
更星郵揮斥風雷剗日月萬仞劃墜何其遒繁華歌舞  
今誰在千年惟見水空流

無題

昔時霍嫖姚威棱何壯哉百萬馳大漠北上單于臺歸  
來缺三字甲第自天開蹋鞠咸陽市萬人爲奔摧徒憑  
漢皇寵路人誰敢哈封狐得猛虎掉尾干風雷浮雲改  
朝市昆明換劫灰得問驃騎宅柏梁久蒿萊犄角獨了  
此高枕商山隈

無題

自少耽寂寞所慕非華軒沈溺墳索中才孱好彌敦冉  
冉歷星霜鬢雪忽已繁有時塊獨居中愉口難言顧彼  
塵俗慮偶亦侵靈源雖復旋揮去未能芟其根餘年倘

我假庶哉內能韃慨焉懷古賢高風一何騫

姚惜抱論書絕句第三首云雄才或避古人鋒眞  
脈相傳便繼蹤太僕文章宗伯字正如得髓自  
南宗余謂太僕於史公誠可謂具體而微若宗  
伯書以右軍筆法繩之正乃同牀異夢耳

眞脈從來幾輩知虛名休被古人欺南宗自有麒麟髓  
其柰華亭證解支

次袁爽秋郎中

飛見贈原韻

別來不記幾寒暑憔悴時危一老翁舊雨偶同雲會合  
眞愁能與雪消融王城浩浩著君隱世路悠悠誰我同

百感紛紜從掃卻且拚爛醉荔枝紅

雜興

品庶鬪隙中達人邈天外有生同擾擾由合一何隘曉  
鐘羣動作扶桑開天靄賤者營甌噐貴者耀冠蓋寸心  
各有營惟力所能屆當其互相競鎔銖甯少貸雞鶩爭  
黍粒蠻觸戰纖芥驕債成毒螫奔馳吁可畏嚴陵揖光  
武把釣七里瀨高風薄九霄俯首視嵩岱

雪

推枕窗光眩兩目起驚庭樹千枝玉連朝醞釀尙逶迤  
一夕嚴霜何催促廣庭蕭索羣動靜時有寒聲聞折竹



湖山遊記卷二  
三  
倚檻渾忘冷侵膚一片瑩淨看不足卻思野外真瓊海  
高下川原萬珠琲若爲扶杖最高峰縹緲荒寒出人代  
漱滌沆瀣凌太清一洗腸胃蕩肝肺姑射仙人若可招  
玉宇瓊樓直宛在誰能與此塵俗侶終日蛄蜣轉糞土  
張季直尊人七十生日

海上狎鷗客翛然鶴骨寒金經傳夜籙玉札醺晨餐一  
老眞松檜盈庭蒔蕙蘭舉觴千里外南極獨長看

留別蓮池書院諸生

自我來畿南奄忽今六載顧惟顛木藥謬當葑菲采我  
誠慙朽株君等競蓓蕾枝蔓相縈結戀嫪不可改乖合

苦不常歸纜忽將改征鴻念疇侶欲去猶回睠矧與二三子別淚忍一灑離腸奔九迴糾若淮淵匯萬古聖與賢曠世不相待神合形終睽志士涕如磧幸得並世生在遠亦何喟人生天地間有若桴浮海波濤一衝激誰能知定在努力追前修九州猶庭內

游習家池

辛卯時主講襄陽鹿門書院

碧山抱朱閣清風漾綠漪滄浪一曲轉管爾習家池古人已千載卽事聊一卮茫茫無窮世誰歟復來茲

晚登聞喜亭

高亭危峙俯潺淙日晚登臨興未降當戶一尊延素月

卷簾萬岫繞清江不嗟風物非吾土信美山川是此邦  
老去萍蹤任飄轉杜陵狂客我宜雙

眼底

癸巳時寄寓西安

眼底喧囂實可憐江河日下作深淵紛紛燕雀何足數  
采采蜉蝣空自鮮冀北名駒誰萬里遼東歸鶴已千年  
散人豈合知時事獨念

皇家一愴然

秋夜

一夜西風水始波幽蛩又已饗園莎久拋塵事更誰問  
欲企前修柰老何燈影初搖書味永桐陰漸薄月光多

倚檻脈脈渾無卹坐看長空轉絳河

小立階前秋氣清空庭風露欲三更月明微見鴻飛影  
夜靜常聞犬吠聲依徑螢光時見滅隔牆人語不分明  
東阡近可觀秋穫明喚藍輿郊外行

盤屋道中卽事

策蹇秋郊古寺東臨風一笛暮雲空微茫村舍孤煙外  
下括牛羊落照中水際牧童歸夕暝牆陰野老話年豐  
鄉村景物真如繪堪歎人間馬耳風

冬暝

晚風蕭颯動寒蕪倚杖庭前一慨吁屋角斜陽喧凍雀

枝頭殘雪立飢鳥貪污成俗國維破砥柱無人士氣孤  
世事久經歸袖手年除聊復醉屠蘇

濂亭遺詩卷二終